

來寧族最大世爲俚帥蠻獠皆歸之純少警
敏通章句頗善書父宣甚愛之伯父猛力陳
禎明時安州刺史倔僵不賓服貢於陳令宣
治大廉洞而自居欽江隋高祖平陳遣員外
散騎侍郎何稠往嶺表撫交趾因諭猛力入
朝會猛力病劇臨終許稠遣子長真入侍其
後長真歸隋拜鴻臚卿而留宣爲合浦太守
純隨父往來廣循嘗至羅浮及歸見安京山
嘆曰此卽羅浮形勢也因大書易山名爲羅

浮山山上有石後有如和題者是也長真兵
强兼并鬱林數郡隋末梁主蕭銑畧地至番
禺長真歸附時交趾太守丘和和綏荒服甚
得彝情林邑諸國遺和明珠文犀金寶其富
埒於王者獨不附銑銑聞利之命長真以南
越蠻俚攻和和惧欲出迎長真其所署司法
書佐高士廉曰彼兵遠來勢不得久乃逆擊
破之長真敗歸尚欲再舉宣諫止之會銑爲
唐所滅武德初長真與宣皆以地降詔授長

眞欽州都督宣卒以純爲廉州刺史純善撫
衆招徠蔡龍峒民闢其四境請立爲縣已而
徙刺合州族子道明刺南越州爲高州首領
馮暄所陷純舉兵擊退之貞觀初長眞與暄
皆卒而暄弟盎反叛屢欲攻純純閉境自守
唐遣中庶子張元素鎮撫至廉見純謹厚有
禮教其子弟讀書蠻俗向化甚稱獎之後卒
於官

寧原悌欽江人寧氏世爲合浦豪族原悌卽刺

史純從孫也純能以詩書禮義教其族人原
悌少好學武后永昌元年舉進士以賢良策
試於廷時對策者千餘人詔吏部尚書李景
諶糊名較覆以張說爲首后覽對置說乙科
而擢張柬之第一原悌第九原悌出荒服者
得上第朝野咸嘆異之授秘書省校書郎累
官至諫議大夫睿宗景雲二年上以二女西
城隆昌公主爲女官以資天皇太后冥福原
悌上言以爲先朝悖逆庶人以愛女驕盈而

及禍新都宜城以庶孽抑損而獲全又釋道
二家皆以清淨爲本不當廣營寺觀勞人費
財梁武帝致敗於前先帝取災於後殷鑒不
遠今二公主入道將爲之置觀不宜過爲崇
麗取謗四方又先朝所狎諸僧尚在左右宜
加屏斥上覽而善之原悌元宗朝復以諫議
兼修國史元宗取所修史閱之見直書隱巢
事諭曰白馬求卿黃金贖罪卿以爲何如原
悌叩首曰周公誅管蔡季友鳩叔牙雖太宗

不得已之誅亦隱巢有以自取爾由是忤旨
去官卒葬於大墓山詔發五府兵以給葬事
立祠於上蒙村今狼霽山有石室乃原悌讀
書之所祠在欽州北二里曰諫議廟云

神翊字祐之欽州遵化人其先自天水徙南
海至神翊爲欽州叅軍始貫遵化累遷舒州
刺史脩皖山祠建四望樓政令嚴整淮南盜
賊不敢入境子挺以父任爲盛唐令徙家日

南孫公輔

姜公輔字德文欽州遵化人其父挺爲盛唐令
祖神翊舒州刺史母黃氏靈山人公輔登進
士第補校書郎應制策科高等授右拾遺歸
掃父墓召入翰林爲學士歲滿當遷上書以
母老家貧賴祿而養以府掾俸給稍優乃求
兼京兆尹戶曹叅軍特承恩顧才高有器識
每進見敷奏詳亮德宗器之朱滔叛謀合田
悅以蜜蠟裹書間道邀其兄泚太原馬瑤獲
之以其書上聞泚不知也召還京師公輔諫

曰陛下若不能坦懷待泚不如誅之養虎無
自貽累不從泚遂家於長安俄而涇師亂建
中四年十月犯闕帝倉皇自苑北便門出幸
公輔扣馬諫曰泚嘗帥涇原得士心向以滔
叛坐奪兵權居常怫鬱不自聊不如遣人捕
之使陪鑾駕若羣克得之必貽國患帝曰已
無及矣遂行公輔從幸欲駐鳳翔倚張鎰公
輔曰鎰雖信臣然文吏也所領皆朱泚部曲
漁陽突騎泚若立涇軍且有變非萬全策也

帝亦記方士桑道茂言遂起奉天不數日鳳
翔果亂殺鎰帝在奉天有言泚已爲帝者宰
相盧杞曰泚忠正篤實奈何言其叛傷大臣
心已而僞詔至且知羣臣多勸泚奉迎乘輿
者乃詔諸道兵距城一舍止公輔曰王者不
嚴羽衛無以重威靈今禁旅單寡而士馬處
外竊爲陛下危之帝曰善悉內諸軍泚兵果
至如所言遂擢公輔爲中書門下侍郎同平
章事

見通鑑

帝徙山陽至城固唐安公主道

薨主性仁孝許下嫁韋宥而遇播遷帝悼之
甚詔厚其葬公輔諫曰卽今非久克復京城
公主必須歸葬今方行路且從儉薄以濟軍
士帝怒陸贄再三救護帝怒不已乃罷爲太
子左庶子尋遭母喪服闋復爲右庶子久之
不遷順宗立起爲吉州刺史未就官卒憲宗
時贈禮部尚書

宋黃叔達字公濟靈山人爲人鯁介持風節以
薦辟補正額攝管隨軍政破交趾玉山寨克